

07 MAY 1998

AGONG TERIMA WATIKAH PELANTIKAN DUTA CUBA YANG BARU

KUALA LUMPUR, 7 Mei (Bernama) -- Yang di-Pertuan Agong Tuanku Ja'afar hari ini menerima watikah pelantikan duta Cuba yang baru ke Malaysia Puan Teresita de Jesus Fernandez Diaz, dalam satu upacara di Istana Negara di sini.

Ketika bertitah pada majlis itu Tuanku Ja'afar yakin hubungan rapat antara kedua-dua negara yang terjalin sejak 1975 akan terus diperkukuhkan melalui pertukaran lawatan dan kerja sama terutamanya dalam bidang ekonomi.

"Kerja sama seumpama ini akan menyumbang kepada pembangunan dan perkembangan ekonomi kedua-dua negara, dalam usaha meningkatkan taraf hidup rakyat," titah baginda.

Titah baginda, lawatan rasmi Perdana Menteri Datuk Seri Dr Mahathir Mohamad ke Cuba pada September tahun lepas dan tiga perjanjian penting yang ditandatangani samasa lawatan itu menggambarkan kepentingan dan komitmen yang diberi oleh Malaysia terhadap hubungannya dengan Cuba.

Kerja sama rapat di kalangan negera-negara Selatan pula, titah baginda membolehkan mereka mempunyai suara yang kuat, lantang dan dihormati dalam usaha membentuk suatu masyarakat antarabangsa yang adil dan saksama.

Puan Diaz, 60, lulusan dalam bidang sains politik Universiti Havana sebelum ini merupakan Konsul bagi Hal Ehwal Perhubungan kedutaan Cuba di Malaysia sejak tahun lepas. Beliau telah berkahwin dan mempunyai dua orang anak perempuan.

-- BERNAMA

AKT RI